

Uunga siunnersuut: Danmarkimi kalaallit ilinniartut atugassaannik kollegie-nik sanaartornissaq siunertaralugu Naalakkersuisut suliassamik aallartitseqqullugit peqquneqarnissaannik Inatsisartut aalajangiiffigisassaattut siunnersuut.
(Siumumiit Atassumiillu Inatsisartunut ilaasortat)

Akissuteqaat

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Siullermeerneqarnera

Naalakkersuisut siunnersuut qujassutigaaat.

Oqaatigineqassaaq, kalaallinut Aalborgimi, Århusimi Odensemilu ilinniagaqartunut immikkut inissaqartitsisoqareermat. Københavnimi kalaallinut ilinniagaqartunut kollegiani inissanik immikkoortitsisoqarnissaa qulakkeerniarlugu 2014-imut aningaasanut inatsimmi aningaasanik immikkoortitsisoqareerpoq. KBH-imi kollegiani inissanik 10-nik juli 2014-imiit qulakkeerisussamik isumaqatigiissusiornissaq naatsorsuutigineqarpoq, amerlanerillu 2015-imi qulakkeerniarneqarumaarlutik. Qulaani taaneqartut tamarmik tasaanerupput inigigallagassatut aaqqiinerit, tassa kalaallit inuusuttut ilinniagaqarnerminnut atatillugu Danmarkimut nuuttut Danmarkimut tikinneranni sapinngisamik oqilisaassinissamik siunertaqartut. Aamma Kalaallit Illuinit oqaatigineqarpoq inissat pisatsersoriikkat, ilinniagaqartut sivikitsumik DK-miinnerminni, soorlu inuussutissarsiutinut ilinniakkaminnut atatillugu suliffimmiinnerminnut/ilinniarfimmiinnerminnut kiisalu ilassutitut pikkorissarnerminnut atatillugu inigisinnaasaat pisariaqartinneqarnerusut.

Aalborgimi, Århusimi Odensemilu Kalaallit Illuinit nalunaarutigineqarpoq kalaallit ilinniagaqartut tamarluinnangajammik ajornartorsiuteqaratik ilinniagaqartut ineqarfiini inissarsisartut. Tamanna Københavnimi ajornakusoornerusinnaavoq, ilinniagaqartulli kollegiani Københavnip avataaniittuni inissarsinerisigut aaqqinneqarsinnaalluni.

Nunatsinni kollegianik maanna amigaateqaqaagut. Ineeqqat 200-t missingi maannakkorpiaq attartugaapput, pingaartumik namminersortunit aammalu pisortanit attartortinneqartut, taakkulu illoqarfinni ilinniarfeqartuni anginerni siammasillutik kollegiatut atornerqarput. Immikkut ittumik attartugassanik pisariaqartitsineq kollegianik sanaartornissamik maanna pilersaarusiaasut aqcutigalugit millisinneqarsinnaassanganinneqarpoq, nunatsinnili kollegianik amigaateqarneq suli annertujuassaaq. Nunatsinni kollegianik sanaartornissaq Naalakkersuisut Danmarkimi kollegianik sanaartornissaminngarnit tunngaviatigut pingaartinneruaat. Tassa, ilinniagaqartut pitsaasunik ullutsinnullu naleqquttunik atugassaqartinnerisigut amerlanerusut ilinniakkaminnik naammassinnittarnissaat ilaatigut qulakkeerumallugu. Ilaatigullu aamma sanaartugassanut aningaasaliissutit nunatsinni suliffissaqartitseqataanissaat, taamaalillutillu suliffissaaleqisunik ikilisitsinissat qulakkeerniarlugu.

Taamaakkaluartoq Danmarkimi kollegiat siunissaq eqqarsaatigalugu oqaluuserineqarneranni isummersuutigineqarnerannilu aalajangernissamut pitsaasumik tunngavissaqarnissaq Naalakkersuisut sulissutigiumavaat, taamaattumillu Danmarkimi kollegianik sanaartornissamut ingerlatsinissamullu aningaasartuutissat qanoq amerlatiginissaannik naatsorsuinernek piniarnissaq piareersimaffigalugu.

Naalakkersuisut taama oqaaseqarlutik siunnersuutip akuerineqarnissaa inassutigaat.